

授

堂

詩

鈔

授堂詩鈔卷之四

偃師武億虛谷著

孫秉恭校字

丙申十月留別同社諸子

行行撫長劍鬱鬱重太息男兒生不事生計空令飢驅縛修  
翼憶昔孟浪走蜀秦懷抱已盡冷向人只今偃側復偃側胡  
獨窮逐瘁顏色君不見病驥踣頓奮長鳴局促櫪下終無成  
又不見黃鵠一息走千里蔑視腥羶棄如屣忍枵其腹奔西  
東垂雲之翼歟爲起况我壯浪須自謀偃蹇抑塞徒詩囚骯  
髒未衰鬢未素吾道豈得長悠悠碣石風高黃金臺燕山雪  
浪滄溟開人生齷齪不得意對茲亦應狂喜來奮袂長嘯出  
門去猥碎蹉跎胡爲哉

男兒句上三下四昌黎句法

鮑蔣頤

虎牢

嚴天蕭索冷綈袍獨閱艱難過虎牢  
折黃河潰浪捲望回青嶽鬱雲高  
復隍已共虫沙恨古鎮空悲犀甲逃  
廣武山前垂日暮那堪老阮首頻搔

鄭州

南山巨卻畧南疋偃突兀中餘平野曠  
俯讓勞人豁此地半誅茅採葺營安宅  
不勝驚沙累村屋擁欲沒曉暮影慘淡  
跛陀塵鬱埽况茲十月交冽風吹短褐  
病葉紛隕黃落照半倚赤而我亦胡爲  
空囊行不輟

許州述感

荒鷲羈城城入塵一爲長嘯一傷神  
高陽星聚漫稱里曲水  
園歸又幾人園宋文路公建後以贈賈文元  
千古悠悠添旅髮半生碌碌等  
勞薪况經蘇老清遊處無復梅花舊日春

早行郾城道上懷趙興一趙和聲兄弟

天寒低霧重林迥淡月影慘戚累于役悄然過臨穎尚有素  
心人高卧鄧子境守經存吾道汲古發深猛矯矯雙芝英大  
雅歎爲整我茲間何澗靈臺蕪榛梗窮逐莽無時壯心灰已  
冷何當深與晤一鞭策清省浩蕩終所適萬里搏滄溟

贈興一趙二兄

坦畧侵成癖何緣鮑叔知相憐呼以弟過勉是吾師卽藥味  
同諫紉蘭佩不移交神渾漫與皓首應爲期

贈和聲趙二弟同年

秀發推吾黨，畏友如弟少。相逢意氣豁，慰予渴懷抱。酒酣轉  
激越，喜子致身早。

君二十六成進士

天然羈繼脫，俾以恣所討。九臯

奮清暎，振擢仙翮矯。昔如六一公，學蔚人倫表。亦因舉制科，  
斯文得爲考。自非務閑屏，迅忽終温飽。十年當作吏，茲意長  
枯槁。俗龐紛旁午，束縛何由掃。惟古尙有云，榮名以爲寶。

西華道上

無緣認柳城，漠漠一烟橫。家鷺隨意開，寒塘盡日鳴。村荒稠  
老樹，徑窄度洄澗。倦目頻相豁，逢人數問程。

陳州

柳綴殘絲黃葉斜，朝辭旅邸暮誰家。行人且莫添長恨，臥治

閣前隈落鴉

抵鹿邑訪傳二兄聽思同年

負氣好男兒名傳邑盡知傾囊贈客去是君閉門時

贈聽思傳二兄同年

腐臭沉盲膏真氣縛欲死安得呼魯連歎然回生起自與君  
遊時奔瀾庶有祗高標穹萬古峻峒長劍倚爽風排秋旻盪  
胸抉結痞下視蠅嗚啞其唾猶泥滓予生狂且騃無挾而自  
恃君獨黨枯朽歡愛如昆弟請爲舉一詞質言或勝俚男兒  
殉意氣豈必闕其趾所恐輕於擲毋乃非繞指吾聞古至人  
龍蛇隨所似虛而與之旋偃伸良有以

與傳二兄述懷

柴門寂寂影蕭蕭貧病交侵聲愈寥空橐誰餘吾道恨縈袍  
不受故人嘲飛狂拚去無生計用拙歸來有舊巢檢點奚囊  
傷淚句長留天地付推敲

睢陽行

梁苑蘆影攪雪飛蔓草窟深蒼鼠肥梁王高晏曾幾度緇拔  
埋骨罷獻賦寒蕪悄悄遠暗塵北隱黃河半已暮遮莫行人  
追平臺委黃縈碧成廣路

雪中自虞城渡河晚抵金鄉作苦寒行誌感

北風怒撼元陰裂黃河凌澌瀆如結黥篙拘折催不開枝撐  
窳卒紛屑屑我時競渡亂糝糊皮死入朽皴入膚去年炎蒸  
下西蜀今年辭家寒又酷曉夜冰霰刮未停遊子千里走送

暝霜重平歷徹骨瘦做裘屨慵生登絢喑聲呵噤噤欲痴頤  
邊戟張僵琉璃噫噓嘻念吾刺促有一擲感激內熱強支持  
不爾骯髒亦應衰凍折鬚眉歸何時

詠懷句呈 容圃夫子

牢落風光帶病身三年飢走暗酸辛共誰鹵莽垂空橐偏爾  
飄零逐暮塵義不受憐隨計拙才能折命累家貧剩餘懷抱  
歸無處欲繡平原趁碧春

登德州城南樓懷古

南樓聲急侵暮昏望盡南天欲斷魂荒靄一橫傳歷下寒蕪  
千里度平原臬卿有弟風何烈博士無營露自繁不減登臨  
強惹恨且餘孤抱倒殘樽

董子讀書臺

江都貫天人蔚然匡劉上遺臺向寂寞高山猶爲仰當其官  
博士孔室早入想課寂鎚經與兀坐冷書幌三年園未窺已  
策賢良賞吁嗟自秦火典型墮搶攘鬼語紛藉亂嘈雜鐘鼓  
響惟天篤雅材抉翳澄秋爽竹杯與繁露例起春秋仿推步  
工五行愚者目爲瞶竟致諧主父千載痛翹翹我嘗弔洛下  
淚洗賈生枉憂來至斯州眺首恨搏鰲平原何浩浩廣川日  
莽莽大雅久憔悴吾茲將焉倣

贈柴明軒

君以恩貢  
試用州判

鼓車搖輻輳騏驥頗迴首朱鳳心嗷嗷常不厭飢走是以古  
男兒渴懷思藉手苟得齊其願安忍棄五斗柴侯傾相遇語

語慰枯朽坦豁對吾真感憤憫衰偶中腸何內熱許身盡職  
守一官如可試尙爲衆人母煦育發陽管卵翼及鷄口斯言  
箴俗吏毋乃肉食醜昔誦春陵行蓬勃憶漫叟君今終所圖  
豈甘召杜後簿尉何時脫若若綰紫綬上以沐雨風下以剪  
狼莠此意恐未伸瞑目爲君吼

贈鮑西莊

肉食糟菜色古已相爲掣而君何惻惻欲隨十九人老驥愁  
伏櫪獨鶴不易馴况携詩一囊陶寫尤然真何必重飢驅行  
行累吾襟努力守空案煮字充腹勻

過滄州懷高達夫先生

高生懷侷儻頽脫衰羣才老驥塵中盡飢鷹天際來恨添人

日作嘯冷汴州臺渤海風猶烈慨慷平鬱開

寓中州新館遺懷

何時春入眼寒綠逐春生去住經年累音書幾度營囊羞貧  
友助魂怯夢鄉情身事渾無賴因人亦未成

甲辰壬召南書院示諸生詩八首

余性抱迂癖與世殊其宜愧此從遊者不恥欲相師謬以來  
請謁抗顏矢一辭六藝之所蘊詰訓爲師資漢儒勤掇拾墜  
緒餘端倪世皆貴苟得鹵莽而耘苗空腹逞迂怪勦說生嶮  
巖遂令絕學賢頽然弊于斯吁惟二三子胡不綜厥遺

二

殘編發孤冢古文出破堵鴻都餘半隸陳倉存十鼓道在勤

摩挲日以勞旁午漸乃窺窳與亦各臻靈府諸子佳少年植  
學先樹圃厚積而博儲數典乃得祖勿徒學面墻膜眼逐羣  
瞽

三

在冉朱絲繩弦之則應矢杞柳戍本姓束縛繞如指江梅自  
獻實藁爲人所齒孤芳終委捐不如蝟食李古有通方人失  
身在妄履願與守生直力甘吾道否何以爲之防知恥而已  
矣

四

豈弟惟邦伯雅意培翹楚此邦自召公遺教猶可庶爾曹舊  
與習立身先有處又奚爲皇皇狂走陷沮洳矩步戒其逸滋

蔓驕可鋤勤子來相訪提耳用貫女

五

朝聞誦所習抵暮不言疲朝暮恒有適我望亦已期力學勤  
乃獲耘業乘良時世有飽食徒逐隊而嘻嘻爾曹良知愛跋  
予不慮斯頗懼瑣見狃日以俗牽卑人不深古訓偶得皆稊  
梯

六

古訓日在茲顧我學已晚少未辨香草壅茅橫九畹子今策  
欵段歷塊蹶峻阪垂使道無聞敢用莛自輓嗟時不我與悔  
述其未遠况又仕懸駭益不工婉婉起予者誰歟尙以振吾  
樂

七

或云道汗漫焉望尋其涯吾今堅與約從事夫何疑人苦未知學既學途非岐苟不航斷港滄溟任所之又如曲學子屏墻無一爲反日事詆傲請爾坐井窺此亦自古然獨學其何悲

八

儒冠良不誤要當思所稱曳婁空長裾如鶴立軒乘我聞負笈遊樵悴困行勝冥心古典徒會須得聖證而今胡爲者乃云力不勝一簣望九仞功在構巖磴鼓行追理窟焉用計破甌鄙言幸記取用託仁者贈

分陝石

陝北城有石厥狀高嶢峻舊傳唐銘勒溜雨蝕沒痕土人妄

率附不知何所因云昔分陝日二公遺址存余嘗鄙斯說粲

然笑出驚往記周與召自陝而中分東西各主之徵自公羊

文同時惟尙父主伯爲王官

鄭志太公爲王官伯分主自陝以東

賜履得專征

亦至河海濱穆陵逮無隸未開界其垠噫乎千載下陋者踵

紛紛胸固多城府視世皆畦畛此疆與爾界妄以疑古人反

覆湖所起蓋亦由漢秦三輔橫橋側有柱聳雙躡分半岐南

北屹然踞地根京兆扶風地壤接宏農隣

三輔故事秦造作橫橋漢承後置丞

令石柱以南屬京兆北屬右扶

風各分其半石殆由此傳會俗流多茫昧踵謬遺其真西

征記陝縣分職倚山原此石未見錄或以難具論

西征記陝縣周召分

職處南倚山原北臨黃河今石所在與

記相符使有可徵信記蓋載之久矣奈何好事者誣謬恣

橫陳更言盤下土九泉不可跟古老但下拜視之雄且尊相  
戒勿傷劇徒以手空捫念昔杜陵老石筍蠹蜀門尙欲呼壯  
士棄擲見本根我今剗妄迹以懲吐俗昏下以投洪流問彼  
孰爲神

喜魏生至

生靈實人名立德

我聞學之方功在先一扣士當其未學隅坐而窺牖既學茫  
無得已自豐其蔀安知古達人追師千里走袿衣往從之此  
道今無有魏子懷德音問關來相偶世多喜鹵莽勤子黨腐  
朽朝起過陝郊舊館老役守欲訪同門生晨星粲餘斗相望  
頻感念慘慘屢回首古轍顛嶢陵軟脚重繭厚况逢三日雨  
塗泥橫及拇倉猝洛陽道逆旅卧拳肘子獨不知悔要約相

與久顧我漫枵腹聖學愧魯叟有如持大瓠空中不待剖更  
傳二三子亦起從而後閩鄉劉潤崖申次山靈寶陳象齋辛  
王子立濟川兄弟並欲至偃師勤追我遊笑我何所誘

八月二十日李生居來于岍兩昆季歸爲其親壽作此

贈之

李君逸氣掃千夫愛客留連屢用扶膝下坐撫雙鬢裏人間

獨立老於菟浮沉漫去唯呼飲盤薄歸來有畫圖君工作他  
山水

日登堂容一醉不辭破例爲君滯

年來漸亦成漫浪自覺蕭蕭衰病隣意氣頗橫白二子才名  
挺出放斯人莫看老驥伏猶壯且作木鷄養更馴我爲乃翁  
甘下拜此生能遇幾陳羣

懷汝州丁璞岩吏目 四月五日

昨枉陳君書一紙頃乃知有石香于五載久旅京華塵歎從  
簿領等書史胸次盤礴空向人想爲饑驅供役使對河歌呼  
慕秦俠推誠欲攬天下士出尋汝水交春風思挽疲癯轉九  
死自有彌縫返民淳不爲狡獪令公喜冷署索寞餘清陰爐  
烟細逐野馬起湘簾拖浪殺紋生此中無事亦如水閒覓秀  
句追陰何爭傳清調歌桃李十年翰墨臨雙鉤烏絲裁幅滿  
清几世言作丞多訾警君反喜狂屐折齒人生適遇信有然  
豈謂冗官道獨否去歲我客廣文舍與君隣隔僅尺咫不逐  
東野爲雲龍悔從交臂失之耳今歲忽勞素書問知我蠢蠢  
良可以平生頗念虛聲詭浪許未免過情恥思君一語知何

時捫胸各盡胸中事指屈數子長已矣  
黃仲則余少雲清才皆散去歲淹迹  
如君今有幾長歌未半夜中起

寄陳髯二丈

陳翁携古調闕音避時腔觀書用溢眼舉要祛其尤罅隙洞  
見垣繼晷不藉釭博瞻而得理派別如導江置身聳嶽嶽藹  
嶺高崆峒有時傾尊酒滯首翻鬢缸髯奮怒縮蝟背决訶吠  
獠使之俯要津自斷解與舡槐市三月半冥綠搖鎖窗侏侏  
多胷子各以寸筵撞左右厭所求春風拂蘭芷遂覩文翁化  
再起自蜀邗我來汝水畔蹋石澗流淙得翁一携手喜我足  
音是沿牀先下拜斯世惟老雁剖釀呼相酌簷滴時琤琮  
藏初不歇溜雨洒急滌要之不使去三聽漏鼓遙顏澗口沈

砥古道自樹椿謂言逐婉變擾擾風前幢徐聆其注授似以  
導愚蠢厭飫頗自憙彭亨朽腹降悔不從翁學靜以息言嗟

授堂詩鈔卷之五

偃師武億虛谷著

孫未恭校字

甲辰十月十日過魯山留贈李居來于岸昆季

長沙越荆楚江行重逶迤我行何時到未到數歸期非我歸  
意速吾黨係所思國士有二李儒術才名齊舊聞伯仲行負  
氣守屈奇頗能排小儒獨學日下帷昨歲遠過我俾予受以  
規居來自春三月謁予  
至歲暮凡三至偃師榻來俱相從各有胸次爲伯也重規  
矩守質恬而夷文如有源水千頃望渺瀰若使盈其氣天漢  
遂接涯仲氏奮豪猛勢可吞孤羅鯁峭據崖岍鄙世無町畦  
自我獲二俊豈歎起予誰奈此成小別有懷焉可違殷勤重  
一言無爲離羣悲工之就其業在繩墨刀錐手器一已習左

右指與麾匠成由所運工師袖手推嗟汝爾昆弟固宜自相  
師閨寂小園內竹影瘦參差夜窗虛生白短檠膏漸滋此時  
對雙榻悶然不求知執經屢用叩期証所然疑安用他山石  
磨礪始相夷抑吾又有聞賢不免俗移而吾慮二子所移不  
于斯慮其恃有挾未能逃世訾莊生亦有言虛而與委蛇歛  
之歸諸道無受謗者擠苦語亦堪味垂贈不汝欺

昌黎遺響

藕頤

梅樹歌爲李異凡賦兼以示其二子

空廊遙夜芳信耿淡月清泛羅浮影欲邀素心索共憐起餐  
風味嘗傳永喜君無事怡清修手植不喜奴千頭培出庭前  
兩好樹要成鼎寶王公羞坡上椿藟萬溫發蜜珠纍貫香微

穉縱使穠纖附萼多豈能掩却蒼龍骨我從其下徙倚頽頽

隔葉底低藏春

此梅早開在初冬花附葉下人謂之藏葉梅

山深谷邃足音滅此

中多有芝輪困處子窈窕聘不聞坐老烟雨埋斯人爾來又

見此佳木自以孤芳掩繁綠千林葉脫踈隕黃爾何爲者爭  
簇簇紛拏交加橫相遮使我不一開新自上攀遠條下低榿

一一爲出蕊與葩竿擊手摘日不供百匝忽度飛光斜歛爾

一快紛墮槭數枝容漾清瑤席豁見鄭公顏嫵媚洗出廣平

腸鐵石感激內熱淚淫淫難忍此花終見隔却被童奴煩耳

語怪今好事無此客尋簷兀坐意遑遑我亦未免愚公愚使

如列屋炫百貨良賈不應深藏虛况對此花傲冰雪彷彿欲

見瞿曇癡笑盡繁艷競桃李自斂寒蕊逃蜂鬚一重一掩豈

徒歟而我擾擾真堪吁

贈李癡

昔有至人渾沌氏日鑿一竅七日死怪今更多驚與忽紛紛  
刻畫面生痕我歎李癡懷佳趣惟汎天真如赤子于世汨沒  
杳無營其中空洞寧有滓然明一語妙斯人正頗重聽亦可  
喜朝來聞我遊魯陽數日延望頻三起忽復交臂重相歡顛  
狂不悟倒躡履夜闌促席耳語多君獨嗜焉隱憑几更携尊  
酒勸客嘗重之不啻瓊桃李飲人自具有醇醪斟酌至味比  
清醕奈何以此反羞澀苦言市酤瓶罌恥我謂君癡君應癡  
如我踈頑焉足倚世上黠兒捷盜鈴未免見君羞折趾下士  
大笑蒼蠅聲斯何人斯入吾耳羨君聞塵根早離視世三

如鬪螳盡攘六鑿成通透恐不再行乃更憇此語聊爲發世  
曠不謂佯聾君有此我亦洗耳學枕流與君共晤亡何里

日鑿一句七字皆仄玉溪生調也

藕頤

十一日戒行已過五里頭忽念李穎脫山園爲再憇一

日

我生自爲世緣錮遇可掩留多處處况對主人豪且清便立  
斯須還成住出城漭漭暗晨曦顛風橫簸斷前路回首却望  
五里村前日小園話情慄此時客今重來相視一笑真良  
晤列筵闕坐傾清尊竹陰隙窗漸逼暮淨空灑灑漾空花纖  
翳淨掃搖冥霧絳蠟傳信洩春光折來檀蒂杯相屬覆杯堆  
盤爭射覆四坐起立盡停箸書空嚮卜疑有無應機而倒如

弦起反嘆序飲傳三籌不及此樂快風雨醉中一賭或竊中  
往往恃此翻成誤萬事不測恍與惚區區小數難憑輅東方  
恢譎亦偶然須知旁有舍人妬不如卧聽竹雞鳴格磔窗外  
解相訴頽然自顧嘆勞生來朝又遶鴉水渡

鴉路行寄懷李居來于岸二生

鴉路縈縈鴉水頭水遶路細羊腸流嗟欲何往漫然投汎若  
不繫虛而遊輦舉推挽喘吳牛我踞其上佯驚鷗一夫顛城  
頽兩肩一夫浹背揮如油任渠軒輊將誰尤

時覓雙把手  
小車啟行

有風激酸清眸使淚承曉心中抽却憶二子忘百憂蘭蕙芳  
茁生諸幽視天下士于焉求數日要予相聚留懽若三子偕  
浮邱奮翼八極任天游睨世軒冕冠六猴豈復有意爭喧嗽

兩立飽趁侏儒優獨不我遺詎我謀當今豈乏治者歐霜華  
精閃飛純鈎采采溪毛神所羞蓬蓬方擷薪與標不爲世出  
其終瘦感茲緩步聊吟謳行行不減速置郵歸來與子崇魯  
鄒暇日目適濠梁儵此樂已輕萬戶侯不知得適懷與不此  
懷此夜無時瘳漫漫永夜聽颼颼

却憶一接從青蓮得來

竊願

再寄居來于斫二李生

長懷宇宙濶欲尙千載友唱者必有前繼者乃爲偶陰求天  
下士亦嘗規林藪禾黍鬱蓬蓬是中雜稂莠頽雲障連峰彌  
覽皆培塿洗耳聞咸韶轟雷擊瓦缶嗟我獨何幸斯人迄並  
耦抱此徑寸投相期至華首少年謗前輩木強輕老醜區區

草元心分已待覆  
既不有二子來孰與間  
衆口畏人戒狂飲  
近頗不論斗詩成長  
三嘆問知此意否

記襄陽景物諸詩

漢水

吾興閱漢廣滔滔渺  
南紀導源出鮒嶠  
沮洳汎沼沚旁沿納  
衆流東匯望淵瀾  
只應呼滄浪便想清  
見泚何爲鴨綠名  
被自謫袖李使山濃  
如染水亦成紈綺  
長嘯千載下試與  
還舊美

樊城水經注云樊仲  
山甫所封也

山甫舊食朱東畿  
依鄙鄮不知隔千里  
僻在沔水岸河陽

陽樊斯邑近可案

韋昭注周語云食菜于樊詩正義引左傳  
說晉文公定襄王王賜之樊邑別樊在東

都之畿內也豈山甫就  
封亦因食采以名與  
迨後傳異聞杜欽語漫漶亦云就封  
齊與此涉河漢  
見漢書本傳  
鄺氏據何語或亦有所竄撫懷聊自  
捫昔人豈我謾

魚梁洲

沔水隈沙曲中有一洲橫耆舊無人在沙水鬱滌滌孰謂斯  
水窟衡宇掩柴荆司馬誚龐老欸欸話平生率爾成休暢悠  
然太古情當時欲避世今反傳其名寒裳不可卽浩歌懷已  
盈

用襄陽耆舊傳事藻不妄抒

藉頤

層臺

景升據州牧漸亦生雄猜襄陽舊所築岵巽有層臺守戶乃

不足斯又胡爲哉憑高一北望歌呼野鷹來東南逼獬子狔  
犬豕其孩禰生獨一鶚尙使瓜距摧萋萋芳洲草何不興斯  
哀

萬山

朝起視漢皇連山綿成隊激水感旋螺逝與山潭滙詞客賦  
以淫艷傳交甫佩不知此南國化行久橫濱游女儼如卿豈  
有感龍吠吾語雖近腐要已盟諸內悠悠漢廣思庶與此山  
配

峴山

陰陽宅萬物迅于速置郵警焉驚如駛安望逆旅投自有斯  
山麓何人不遨遊睠念千載下惟屬羊與鄒狗名如元凱妄

莫谷成邱斯山猶蹇卧沉碑不可泐去去君勿顧墮淚誰爲收

習池

往聞習侍中宅畔規池小楸竹夾遠曲蓮芡覆深杳漾月閃微暝蒸霧失將曉斯乃水仙窟于焉盪輕矯留以待季倫醉懷浩欲渺酩酊歸去來屣脫浮埃表是處盡高陽何爲戀一沼

鱖魚

斧斤赦散木鼎鑊漏鳴雁有生材不材同一保憂患吾忽感斯魚幾爲世所羨縮項解畏人斷槎走逆筭身世費周防尙遭老饕媠峴潭黥且深勿徒依遠岸試起蘇髯翁輟筯同斯

嘆

自樊城舟行連日苦憶李三光曉得四絕句

秦川如掌舊經遭  
放眼從教得句豪  
不信終成五畝計  
山嵐飽味掣雲濤

歸便歸作剝閒身  
何事逃禪玩世人  
慧業根緣須有數  
却饒

靈運笑含嚔

君弟于岸詆君佞佛甚切

五里村頭狂飲處  
折梅射覆共歡呼  
我今已泛江波上  
還寄

梅花信也無

臨溪草屋隔溪砵  
耐幽人自對窗  
他日買山真有力  
從君夜聽碧流淙

白漁灘

連日困風沙瀕洞顛浪盛朝乃劈積岸回旋山之壘有灘  
白漁欹石橫水腹激水射篷艙轉船澁轉轂此生盡艱艱水  
行仍輾轉奈何產犖确悉爲頑者族頗頓結網人掃灘時與  
覆連跨數小山崖竅吞局縮誰復童其顛赤癬界磽秃疑從  
劫灰餘攢撮巨以蠹倒映穢淵潭一一混鴨綠吾欲起愚公  
移此豁心目

寫懷

朝起迤逝水暮灣傍賈船朝朝與暮暮打頭篷底眠彌望情  
不極晁漾浮遠天茲行竟何事毋亦爲世牽人生重感喟意  
氣使之然素交二三子分飛如曉煙逝者長契濶無淚滿到  
泉生存知復幾盡讓祖生先如我更屯相忽已迫中年生既

乏媚骨且不耐人憐以此終齟齬學鄙欲求田歸與理吾業  
不遠其已還

哭孟筆山三絕句

狂到龍山憑笑傲窮如東野共哀歌三年契濶知誰健一病  
摧萎如命何

不須餽奠束生芻爲告重泉知也無健婦當門良不惡留君  
阿鷺伴遺孤

聞君垂死終無語祝我他生再作緣從此西州城外路魂言  
尙許夢來還

授堂詩鈔卷之六

偃師武億虛谷著

孫<sub>棗</sub>恭校字

圍魚行

十月江清漩流澀起視灘頭百網集小艇來往疾于風魚潛  
水底目潛泣昨見縮鰓腮含呀人言貪餌依枯槎豈意逐流  
亦遭厄奔馳難免窮投置招搖羣漁成夥伍翩翩聯聯迭進  
膽有似窮逐追亡遁四面遮羅快一舉白榜柝擊轟雷風布  
張兩翼陣倣羽一船衝應橫無前尙綴遊兵作後拒此時潛  
鱗痛無聲跳閃分已知遭烹寒天魚遊接翅比舉網瞥下羣  
魚驚撥刺撐笑苦不脫欲撼網絲撼堅城噓氣頗煩口喞噉  
喘濕不救尾禿頰濠梁無主屢惛惛世間涸轍飽所更使我

涕此揮縱橫斯須搖落波紋赤羣漁笑杳紛矜獲穿腮暴鬚  
堆船底各逐腥羶手張戟尙指出月緣東灣屬屢不復穩貪  
眠請爲舉圍煩再合朝趁市酒紅頰顴我嘆羣漁費百巧推  
磨饜腹恣歡飽旣飽蕭瑟幾餘何何如歸卧食蓴苧祝爾棄  
網赦白小

泊多寶灣是日記所見

早歲穿蜀岷險歷天下半茲行水有程穩泛失驚竄沿流泊  
斯灣捨舟登欹岸挿竹蔽短垣近矣梟烟爨蓬首俯沙女笑  
沓喧里開入市何所有纍纍見魚貫土風好羣逞猶能習荆  
悍視我獨翹立癡如江上鶴道路竊指目殆爲楚咻玩歸來  
尋水塘繁燈已競爛鏗然戛銅鉦祝神福受禱舟人賽神率以金鳴號

而我莽無事卧聽笑語亂且復覓贅詞一博笑者樂

折口

沔水下京山潛入潛江浦舟子輕恬波翹坐任掀舞平野濕  
漑漾四面盡望楚有時微浪湧捨棹但用艣迤邐走折口有  
水會交午西極岷之涯小棚上荆渚其東滙淵潭推盪入雲  
杜而此最劇要曠莽少村塢往往遊販子慢藏遭跋扈椎埋  
姦昏夜被戮梟相挂江湖風波悍猙獍老蛟怒微吾口憂患  
渺渺正愁予

過彭市河

傍崖儼巢鳥連閣架鷄栖沔水逕其下寒落剝岸齊上下三  
十里趁居盡通蹊地候尙旡煖肥苗宿麥黃往聞彭氏子聚

族居于斯誰知閱百載白榜標舊題

市人列屋者皆以彭氏名其業

鄭公署

名鄉屈子田舊畦諸阮里有北越施村住西餘韻人所尚乃  
爲稱其宜如斯湫隘耳得名信詭竒我欲采風謠舟利輕鳧  
驚多見汲寒水銜尾緣磴梯慄慄懷深聳幾見排與擠過瞬  
失向背回首屢悽迷

自仙桃鎮漢水分流東折迤北舟所逕皆淺淤俗呼爛

泥溝

汚逕宜城隈并吞平野感自爾暢其支不復知有陸胡乃折  
斯灣委迤通小瀆夾岸數人家籬落映矮屋中有翁與媪補  
綻趁朝暴婉婉兩稚子軒渠巖獨速黃雞啄呼羣花鴨翼新  
沐拍波挾飛鳴亂流雜鳧鷺朝起惡懷抱賴此清景逐其二

益回滌宛宛入壑各僅可容方舟安得橫千斛譬如小器盈  
狹中貫其腹叮咛時不化芥蒂輒與觸伊予素褊隘奈何向  
局促又復混泥沙灘淺難轉舳舨工沒寒脛推排慄生粟呀  
啞無復鳴點篙置一束利涉煩牽挽何異牛引服我雌依帆  
檣終亦行輾轉是時惟極望土風飽味熟天際扇微颺羽便  
旋牙蕪迅忽此日間詎里數百六回首念所經紛紜多在目  
居人無別營食口累草木敗葦堆輪囷枯槎翻樸遡持以易  
鹽米糞殮潑用粥或亦逐漁艇淋浪濕殼舐足蹋一舞梭身  
衣一皮犢往來鬧如風聚殲及□族傳聞春夏交萬溪漲飛  
瀑嘗有失業徒翹立會野哭更走抵連峰綿延起遐矚朱油  
與白鹽兩山間楚蜀而此獨專名兀傲成一麓

水邊小山土人呼訛作朱

油過瞬轉村坳飛舸逝水曲左右叢繁塘燈火閃煜煜蒼茫  
不見人柁樨森且蓋豈惟少偃蹇于斯聊信宿飽咽真無時  
幸今飯粳菽斟酌水清冷濃過杯中綠困眠枕春浪澎湃怒  
裂颺昨飲李氏園琳琅韻窗竹佳釀甫出盎滿傾泛新馥坐  
客屢懽懽情話頻賡續豈意涉浩蕩蕭然惟我獨與誰謀稻  
梁忽化分飛鷓戚戚感予懷執筆煩用錄吾詩何足道歸應  
障蔽籠

泊蒲湍岸側登一阜幽絕

怪他風姨惡作劇一聲飄沓吹裂帛捨舟泊岸屢瞿瞿惟對  
斯山清吾魄寒流急下旋驚渦吞嗽平欺顛崖石我攀石磴  
尋山蹊自笑當費幾緡屐細草藉坐茵如蕙連錢石薜暈紺

碧數株老木更枯查溜皮剝損蒼龍瘡抱棟却有桐枝鴉踏  
項不逐鳴格磔四顧山陽紆峰回中有幽人斯其宅我欲從  
之安可從清飈瑟瑟生兩腋不緣此泊聊相羊山靈亦應爲  
之惜自有斯阜無斯遊豈因一眺成勝迹我對山靈復大笑  
人生寓目卽爲適會當箭激逐輕舸留與他人訪絕壁

過大軍山遇風

早發沌陽出沌口瀾漫江天吞楚藪四山霾曠曠朝昏崑岸  
風來知不久舟人呼急收驚帆奮張兩翼飛彎環警焉徑去  
不停泊逆流百里須臾間顛頽噴湧漭回互舟行歷浪浪愈  
怒江心鬱鬱轉空雷來如萬騎爭奔赴節度石下悍且颼掀  
推更欲助江潮却顧黯暗暈天際滿船搖兀慘不驕

十一月初四日舟將抵岳州府却憶方山爲作長句

大梁初識方山子生平爲君獨心死兩約遊汝重乘違賢豪  
難聚有如此今歲招我走上京欲以計借遂初盟饑來驅我  
戀鷄肋不逐君去負君情六月炎蒸火雲厚晨辭陝郊逮日  
酉豈因負芻禍沈猶難請發棠爲馮婦歸家坦率由吾真欲  
憑君瀉胸輪菌翹首東望不可致問訊徒感淚盈巾怪予何  
事遽如許又向長沙尋舊侶寒天清激溜驚湍江波渺渺正  
愁予坐思其故豈非慳嗟也可去黥敖憐抱琴却避箏笛耳  
空山落月擘朱絃是時感激生中噫更任浮葉顛滂湃人生  
如寄何病窮退之下令逐已監故鄉家近西山隈山田皴瘠  
春蒿肥飽食舊與空腸慣捫腹大喙寬衣園會將對君長和

倚并招我輩蘇與李

蘇惠波李東川  
文亭書源諸人

兀然燕坐忘晨炊有懷

得此浩如洗如斯不歸何所歸我向頑健今老矣

### 早過嘉魚

歛城抱江隈水噬痕間濶疊巘拱而揖嵐暈曉如潑戢戢樹  
千頭縱纒弄雲藹斯區亦好在苦爲世誘奪朝曦晃晶瑩旅  
目蕩疏豁一舟簸春浪洗耳聽喧聒是日亦風中有萬古情安用  
鳴咄咄

### 泊道人磯

泊舟驚目水雲昏好在顛崖數漲痕魚網崩鬢幕小艇人梯  
碨磊轉山村

南近巴陵未百里螺峰秀起縮烟鬢楚人那解湘妃怨唱徹

月明第幾灣

夜過磊石山

夜氣混漭漾舟行失向背欹峰卧如馳遙與君編對磊石專  
斯名湖口關羣匯時維月脚垂寒芒已就晦激浪射隙窾搖  
兀波光碎賴此成巨鎮屹然收橫潰獨有下瞿唐淫預庶其  
配我嘗憶所歷至今悖病內奈何長逐逐狗名不勇退過此  
脫重險用以誌吾悔

入湖泊編山左阜是日阻風晡後行三十餘里六溜急  
不得進夜步高沙洲之作

往聞五渚會江潮中有君編對岩巖望之若浮出雲濤今尋  
瞥下隨輕舸適當寒落窳冬交天清沙鬱漲浪消巨石森立

鯨與鯨噴薄激盪不容篙急拽帆拖撼狎颶險爲所齧飽老  
蛟于斯幸住顏已凋亂流奔突縈曲臯來如一線可通漕忽  
沂而上湔滔滔比諸秋潦更爲豪迅駛直走怒飛燕昔穿夔  
蜀過百年灘頭牽挽紛怒號平生歷險舊見遭而此所歷一  
何勞孤嶼笑兀水之坳小屋浮葉龜縣巢市人慄悍聲驚曉  
笑予何事逐萍藻昏月半破上千霄浮天而起水影泡于時  
四顧風蕭騷恍惚出沒鼉鼉驕地道潛穴包山高瀟湘浦際  
蘭有茗神之所棲良非迢彷彿帝子垂鬟髻翩躚徑度挾風  
飄翠旌羽蠢雲兩旂萬怪起舞卷霧幃誰其覩者膚生毛張  
樂廣莫羣靈朝鏗眩響韻鈞天璇迷濛咫尺不可招嗟非其  
侶難與邀推艫下坐斗橫杓塔焉欲喪首屢搔得一寓目喜

斯陶此自不減遊逍遙

書感寄舍弟上珍

細思生計真無計大約年來只是慳此語往聞之蘇子于今  
頗亦知其然孤注大叫擲百萬斗酒長吸罄十千古有豪士  
偶寓意浸假世俗矜爲賢倒裝捆載百不供貸粟却邀監河  
憐嗟彼何事好爲爾坐此羸憊寧非顛廼兄勞生已過半忍  
窮取約長踟躕長饑不逢黃獨盛短檠時對魚目鰥蕭然自  
顧何所有家徒壁立室如縣往者孤羈守京邸有客笑予寒  
無氈士貧何病病亦瘳浩歌長嘯倒身眠爾來鈍拙知愈甚  
日度憔悴饑生涎洞浦汗漫浮天起沅澧并蹙瀟湘連我乃  
回首屢感咽飄如一葉于其間有弟有弟在何許豈亦念我

祝我還夜雨對榻良不惡視棄世味如蛻蟬追憶少游生平  
語安得季子負郭田此意問君得知否臨風雪涕揮泂瀾

健一別予已四年聞其日酒于酒乃爲作此箴之

昔者聶蘇謝惠酒爲詩頗怪荒流連景山沉迷阮藉傲畢卓  
盜竊劉伶顛歷詆數子耽麴蘖欲挽飲徒懲其頑知君視此  
若嚙語性獨嗜之不少捐我今與君隔千里人道君癖甚昔

年少白書屢及之而黃圃亦以爲言生也有涯逝不與兀兀終日胡爲然有

時憑陵起大叫此豈有意矜豪賢欲飲亡何逐長夜自伐其  
性頽玉山聖與仙乎安可慕只疑憑崇舞驚旋糟邱生已沒  
千載呼之醉鄉枕長眠不爾胡獨爲所困瞪目直視頤垂涎  
君看此時逞一快亦如羣嘍蟻腥羶便當拂袖揖歸去嗒焉

自守儒生酸浮邱老子令仙伯

君外舅石君先生也

湛如清夜皎孤圓

彼誠能得飲中趣亦猶不勞聲上絃君尙從之勿回還醇醪  
可飲天可全因君寄訊我自憐我近病移謝酒泉

遊嶽麓山歸呈傅二同年

磊石走驚波搏激搖風轟掀推一夜間漸喜泛湘綠傍岸數  
過峯葱蒨豁倦目長沙近可卽起瞻嶽之麓平生好幽尋夜  
遊屢秉燭及是愈神王豈待晨炊蓐入城少焉留五日隔遠  
矚便應山靈笑揶揄怪我俗謁來飛雪霰垂地忽成霖山脊  
猶依微皴裂疑凍瀑舊聞湘西寺左右據巖腹麓山與道林  
名賢過相屬于斯不汲汲顧我真碌碌奮袂緣細徑艱涉步  
局縮四顧造幽邃濛翠晃新沐覓舟挽淺渡撐空仰高屋平

臨渺虛澗紅墻偃修竹是中祀江神靈貺不容躡迴隈遶沙  
衍約略逕水澳山田半犂确層接趁原陸罽布容分畦龜坼  
卷地蹙磴梯數里餘彎環入厂谷羣山圍合沓戢戢干章木  
有松蔚然秀髯鬣動翻撲有如起波濤春喧鳴謖謖下乃深  
結構尙存舊書塾惟宋晦菴子南軒主教讀當時萃多士文  
翁起化蜀至今垂千祀誰歟振撲檄旁見一孤亭四簷深蓋  
覆中存北海詞豐碑亘以蝨叵耐妄庸子鑄劔橫附屬身名  
兩俱滅徒使石礲禿碑陰有唐人列銜俱  
爲諸題名者鏽落我過不忍撫行行  
追幽獨山僧依淨域喜余來不速導引頗周覽石阪紆回複  
云此寺最古神宇嚴且穆蒼官傳六朝殿前老松一株  
人呼爲六朝松溜皮  
薜暈瘵其上極絕頂瞰臨平江曲渺渺極天際唯見欸飛鶴

檣竿互出沒風帆蕩千斛隔岸近城居連棧森如東市開亂  
沟湧驟烟裊斷續更或縱南望嵐靄不勝掬石廩接祝融環  
拱競且簇凡茲奇所收紛霍費省錄岫嶺神禹字傳摹真偽  
瀆何人之所營好事爭馳逐當如遺丹篆不識未爲竝作偽  
強相譁嘆斯非一族峯回障殘陽凜冬寒威蓄藉非迫暮景  
便與留信宿憶初逢故人鯨飲吸江濶歡讌紛未已冗長墜  
手觸賴此得遊歷是罪聊用贖自當營屐齒山行滑如鞞意  
將捷猿猱身與友麋鹿持拙用不材投閒獲多福茲行飽所  
適于懷猶未足會當凌羣嶽長笑悔狂哭

長沙食筍

幾見叔牙牛角栗便嘗鬚髭豕斑平生食料真干敵他日

君居定一灣

望衡吟

有客沿湘七百里推艫頰望引身起天柱翠嶽隔烟靄數日  
還回紛不已晨興忽指光熹微陣雲淨掃煥如洗衆峯嶙峋  
拱而向獨稱雄尊高岷嶷我乃遙瞻亦肅拜是名巨鎮歷南  
紀韓公默禱始潛應予幸睹之色然喜來無所祈亦見容太  
靈相視豈有以嘗聞天帝赤燁怒佐以祝融兼靈峙

河圖衡山君神

姓丹名靈峙

翼軫下應感朱陵鈴總火維信此始萬怪擁環富靈

窟氣壓九疑頽且倚一重一掩鬱孤聳再接再厲幻奇詭世  
徒紛然窺九面莽莽翠微安可擬丹砂竹箭材千尋更能富  
有綿神社早歲華陰道上行惟望三峯近天咫去年兩度瞻

嵩高仰莫卽之險折趾豈如今日瀟湘遊坐挹古嶽嵐浮几  
始知天意憐病窮假之間身任歷抵藉如早出縮銅綬一官  
羈束良已矣歸來書此紀南行用詫吾黨二三子

觀音巖

安陵十里下飛洪中有巨石驚轟龍共指狻猊來西極欲以

幻化朝真容

江心卧石土人呼爲獅子石

傍巖層樓巧結構飛棖浮柱梯

青空至人于此雙跌坐觀諸法界隱濛濛我走其下瞻引領

有鐸絮語穿玲瓏不識何時危厓裂山骨窅碎非世工或云

巨靈怒奮臂穿穴洞腹空其中又疑五丁鬪頑力顛頽崩豁

巽江壅後之好事更奇詭欄楹插架高穹窿攀尋忽思度九

曲步虛聲起來天風板隙下窺渺無地畏險自捫意已冲道

人指予看題壁數字隱起缺月朦嗟世狗名動如此一靴  
滅隨旋蓬去去挽舟徑相去灘回厓轉浩難逢

十二月一日與東川別于永興歸自舟中賦詩五章寄

之

訪君四千里爲君三日留去返誠草草竊過王子猷掛帆亦  
已下便江多急流故人憐行邁別淚酸兩眸肩輿詣淺岸遙  
望戀歸舟殷勤屬舟子灘溜慎所投此意良悽切感予中心  
抽

憶昨對牀眠絮語速將曉中成勝哀樂百感腸中攪勞生逐  
逝波頑軀等過鳥屈指舊所歡頽然卧秋草對此信悠悠焉  
能強懷抱君乃重慰勉云當慕輕矯忘情隨冥化太上之所

寶勿徒憂自煎遽以垂向槁再拜謝君言提耳敢用藐

與世嘆寡諧輟筋忍饑腸今日曷云樂索酒共君嘗問之知  
有以形骸兩相忘忽復發永嘆悲盈涕泗滂使君真不凡乃  
許唐衢狂徐已還自謂此殆近非祥揮袖一破笑斫地效王  
郎

縣齋枕小阜眺首時先上南對鷄公山蒼邃綿成障城近百  
丈洪洶濤助神旺富此山水窟遇境卽閒暢胡不栽竹木飄  
蕭邀清颺他日成佳蔭幽絕收萬狀君以署知縣事未暇爲此故語及之便應  
十年計留茲來者睨

相見苦難久繼見知不數且與守斯須牽袂悲盈握尙憶湘  
之南幽討最云樂君如牧斯土秀句益成琢我爲勉一行鼓

氣爭犄角會合古難逢此舉恐蕭索安得繫飛蓬驚旋終所託

舟抵湘潭書懷并寄都下諸子

半生幽咽弔寒峭終歲羸離眠老蠶剝冰剝山隔冀北衝風衝雨過湘南

余適長沙又抵永興閱四千餘里途次風晦雨淫灘惡淺塞不可悉記聊取其阨尤甚者賦詩二篇歸示子姪輩時乙巳正月十九日船泊石牌也

憶我過巴陵行行益塲坳劈浪衝箭激東湍銜車軻百丈爭牽挽數日遭抑挫點篙漩折臂依岸泥沒髀鷓鴣軋慘餘喘徐呀悲無奈閃如魚脫鈎邇若蟻旋磨嗟此艱旅程嗒焉抱凍

卧奮呼知誰健摧喪其終懦隨波誓未能急流退自課病身  
好歸來勿被泥沙澆

右阻溜

南方氣恒燠窮陰終不雪去歲凜寒甚斯地陰晦泄岸剝滑  
泥徑蓬壓堆麴屑抑抑舟影遲涓涓江聲咽迷漫容許濶縱  
縱閃驚瞥衣濡凝垂霰衾擁僵成鉄暮泊灣流漸朝起帆凍  
結是時倍淒其有客獨愁絕抱炭耐餘烘煨芋饗老養此境  
夢無時吾共長惓惓

右阻雪

懷召南從遊諸子

往借數千步陝郊郊外山峯似峴首于今艤舟泊襄樊却對

嶼山杳無偶我初往赴邦伯命

魚門程二丈屬之觀  
蔡王公故有是舉

自慚鈍

愚顏且忸來館于斯從者衆吁嗟數月爲之久雖不汝拒喜

汝隨坐欲畫杖屨諸口豈比寸筵撞巨鐘一一鏗鉤鳴應扣

而吾數子業其間視余蠢蠢輩先後強顏頰復理茫昧求十

得一遺者九細思此理費推尋不如守約善爲誘自從乾沒

逐利移士多曳裾喪所守昔子輿氏嘲齊人歸自墦間驕妾

婦吾儕幸已冠儒冠身竟蹈之嗟可醜或獨與盟或羣規□

諸婉變那妨詬炎曦困溽鬱以煩飛焱漲霾汗顏厚時其迫

矣逝難留爰命中車逐塵走浮生泛泛屢漂萍離羣惻惻怨

折柳吾徒徒事淚瞢眩

時諸子送予  
有泣下者

雖立斯須終分手豈知

斯別亦偶然至今若憶嘆何有十月風冽江湍駛浩涉大荒

墜蠻藪羈帆折疊歸無時凍肌痒瘵驚已黥生不諧世寡新  
歡言約久要惟老友困無所遇寧受憐解裝依然窮次肘古  
有長餓眠空山况可歸田沮溺耦能來佐予覓耕犢期以永  
好報瓊玖

長堂詩鈔卷之七

偃師武億虛谷著

孫未恭校字

題額英書屋窗前海棠

庚子三月

滿園晴艷解含嚙盡逐東風桃李春誰似此花新睡足一番  
淡抹一番勻

舍姪熙淳附書促予歸期

庚子六月

吾家老諸生今惟屬小阮三十未成名矢志守編簡書來促  
予歸讀罷淚空潛惟初少年日共舍薛氏館課讀脫云暇過  
從期向晚暝烟冪天際四野風來遠招携二三輩藉坐踏蒼  
蘚高談有羲皇羞稱及儀行自謂薄技奏欲以長材輦其時  
歲纏子賓賢開鄉選歸家治裝囊與汝相結伴秋氣日已厲

脫葉碎于剪回首事堪數屈指暑且短夜宿洛口灣曉登虎  
牢阪却望天水浮晃漾蕩日暝黃流潏奔渾一瀉掃愜澀回  
薄激山麓吞噉崖窵上下登梯間吼耳風裂喘遂投敖倉  
道陂隴漸低偃柳影弄踈踈棗下餘纂纂離離瓜瓟繁畦布  
競如卵翹翹禾麻秀穉極東似舒道旁時擷採亦想物懷坦  
薄暮抵涇水疲驢策就蹇乃謀舍之去呼舟事牽挽板閘或  
不通塞流半淤淺望遠不可極捫懷憤且懣汝時亦好事助  
予啟行趨蒼黃追中夜狺狺吠離犬有屋隈叢薄數椽近修  
堰暘睽光閃瞥望門飢可歎煮藜調溪毛噬齧過鼎糲濁膠  
時就吸舉浮輒引滿飲啄信有數古語諒非誕遲回數日留  
倉猝迫程限入城步鎖院多士紛料東棧牙易東薪切藜惟

稽稗及其待闢門煌煌閱鉅典胄子盡鵠立羣公衣帶綬時  
維重懷挾露索盪胸袒予生半負氣自捫且恐偏汝弱不好  
弄強顏亦成規須臾入試席據案抑首俛文頗爲涇體以矯  
時婉變妄異當入殼五色終宜顯豈知時有違竟坐命多舛  
杜門強自課昏塵歷書板逮今十餘年歷歷猶掛眼雖吾幸  
一第小勝何足算半世隨艱轍此乃輪初轉訟過誅心茅搜  
古勞足繭何與謀溫飽言利子所罕歸來重聚首聊與爾俱  
勉

題丁石香雅白圖

乙巳

汗漫十年隨隙馬酸寒一尉戀棲鷄憑誰寄語情懷惡寫向  
汀洲傍舊溪

送趙興一赴都

一官需次冷蕭騷拚捨閒身欲坐曹  
早學屠龍成底事年來小試覓牛刀

與君舊走都門路飽食邯鄲道上梁  
今日憑君還寄夢可能回首憶淒涼

王次守借二李生謁予偃師飯後持素紙  
摩挲微欲要予贈言者遂書此以示  
丙午三月七日

王生過我來鄙懷輒傾盡舉舉見秀發  
卽之彌可近中有矯然性動與世矛楯  
俗物何瑣細筦爾但用晒結交得二李  
歎接久愈謹事我鈍朽者聞如侍側閉  
此豈負道器任重恃修軫文或未同工  
龍蟄寧混蚓脫爾奮騰竊鬱律飛海蜃  
所噬

憔悴膚遭家屢空窘朝起拂空案暮對涕空困暮暮與朝朝  
無衣持可準吁惟廉吏後誰與致推引願子甘窮卑撐腸飢  
藜藿世豈寡要津投步應須忍草腐猶爲螢木朽或蒸菌顧  
如我輩人豈以不植殞

八月十四日與方山文亭對飲夜已過半步至宋故宮  
登萬歲亭絕頂歸書所見并邀二子和之

酒酣斫地膽意籬非歌非嘯狂吾吾簷際白水浩如鋪起弄  
泛灩淡月孤便携郭李相招呼安事刺促煩童奴小閤寂歷  
繚且紆夜影的爍望有無有厖狺狺怪吾徒却驚惡臥兒啼  
呱行行恨不翼雙鳧坐失流光忽已逋瞥見兩闕髡黃朱下  
臨澗水如葑湖微風颯颯驚箭蘆我時藉草頽盤跣重露瑩

晃貫蠟珠胡不奮起垂霑濡相與大笑安用扶樂哉此樂衆  
與殊憑高而踞靈所都豈謂斯可容腐儒高李吹臺跡模糊  
千載此樂與之俱仰吸沆瀣甘屠蕪蒼茫四阻梁園蕪黠慘  
尙見鐵浮圖城北隅上方寺鐵塔隱中可見天漢咫尺不可阻對茲且以撫  
膺吁旁有窺者爲誰歟破衫席帽黑而癯涼夜不獨眠毡毳  
喜聞我輩紛嬉娛招之不顧走徐徐掩入土窟目驚瞿安知  
此乃非仙乎歸來坐用手自摸幻影起滅真斯須今吾何事  
疲吾軀獨逐烏有勞甚劬母乃自墮狙公狙東方閃熠星流  
烏逮曉尙比夢蘧蘧急招二子大合釀今宵滿泛醉蟾蜍底  
事不用關心渠

哭程魚門內翰

忽忽感中年哀樂每過量自聞此老歿泣然益聲放前歲赴  
都下師門重剝喪得與痛握手聚哭一相向頃乃過陝郊老  
病遭沉恙面墨深無光出語尤清旺臨行贈詩篇生平盡斯  
唱尙期投故園生死要余訪孰意悲永濶不爲神者相垂歸  
老白頭奄沒浸黃壤何日得首邱纍纍成反葬時歿西安紛沓諸  
少年遊談唯君仗亦有當塗子脫網賴君貺問誰恤遺孥反  
覆眞難狀我欲走江東扁舟舞空漾臨流不可極頽日銜重  
嶂魂兮倘歸來無徒悲成悵待我需十年掬土覆君壙

輓余少雲

癸卯

法源寺裏舊行藏悲吒生平淚幾行長吉命騷終掩恨正平  
綴賦忽云亡阿兄夢草還名謝有婦斂衾定謚康地下爲郎

原不惡耐君斗酒喚君嘗

懷李東川

簿書叢裡久縈縈尚憶貧交續舊盟

今春寓大梁張怡堂自長沙歸致君問訊目

斷衝陽空信字胸吞雲夢是吟情遂初惟我知孫子中夜憐

君似祖生別後五年殊索寞擬工小律待敲評

在京師日君嘗囑予學律

句近頗爲之

傅聽思

傅二生平貫負氣一官竟絆澤南州如斯強項爲誰健近亦  
折腰便學柔冷署須煩蛙兩部閒洲要鄙木千頭腐儒故應  
出酸語已辦輕身看急流

憶椒花吟舫草木六首

槐

掩藹庭前樹午槐晝蔭繁豈惟寄蔭藤蔓亦滋緣東之蒼  
皮禿繫以弱莖綿遇物本無擇相期共所天我嘗坐其下秋  
聲引晚蟬頃我欵言歸筇翁館已捐春風坐銷歇百卉不成  
妍寂寞小閣內誰與盼怡顏

樹東先生構小閣自題其上曰  
阿柯陳光祿以筇書之

竹

北地苦迥寒僵土凍根裂竹弱尤踰躡經冬惟抱節緬惟小  
園內蒼玉束成列翹立三十竿挺特焉可折我歸師翁意墻  
東謀養拙數叢幸栽成塵外傍孤子森踈茁芽繁疑疑秉圭  
臬坐聽解籜風颯然銷內熱

芭蕉

往歲夢歸鄉蕉葉響城城比來踈窻前想猶爭茂緡團樂鵲  
尾扇飄沓翠羽灑隙光稍入窺綠天漲滿屋秋來霜霰早病  
身怯磽秃覆草冠其巔卷懷仍一束待悟此中空卽是生意  
足

松

朝來倚南榮聳翠浮翁訪暮坐撫孤松風生聽澗瀨蕭然鸞  
鶴姿興寄雲山外何時老謫仙忽與蒼髯背兩株慘無顏病  
偃如敝蓋我自要歲寒信誓礪與帶期成千歲苓空中固無  
害

薜荔

薜荔漫墻陰鈎營空翠積雜沓微雨後寂歷涼夜夕似閩山

鬼來振衣風生腋蒼鱗怒翁張老鬣爭辟易聲嘶撼四壁  
然戲作劇感此起傍皇展轉不能席我今暮清景顧念已  
昔

梧桐

筍翁羈曲楹移植雙桐樹秋來最先聞飄葉憂可數採掇動  
盈把蓓蕾縣紺乳留致百鳥巢亦有鳳來伍翁胡早歸化  
然掩杯土遺此小園陰傲傲風枝舞是中闕奇音廣入農黃  
譜誰令賤場師槭棘栽成圃

蒼言怪予久不寄書作此答之

我久棄帖嗶癡坐蠅抱凍堆篋故人書尋覽腹輒痛世態喜  
頻贈苛禮爭喧闕如君共懷抱尺書安所用題緘煩包裹

印事彌縫惟有飾虛憍惡札供嘲弄不謂子復然遇吾亦猶  
衆何日得交臂潑綠敢春甕忘情我與爾兀息譏謔訟

李敬堂先生輓詞三首

喪車歸故里丹旆望翩然屈指環三月椎心到九泉斯人如  
可贖大道不終捐我擬招魂賦漫愁蒿里烟

往屬司寇日廷平獨有公南山仍舊判東海識陰功舉世今  
安放悲君舊固窮此生河嶽氣還以付長空

十里繁臺下竟埋古典型長號終侑獻再拜爲書銘宿草知  
榮恨生芻感涕零相期盟久約原下屬君聽

寄郭方山

聞君近館召南地憶往懷交雪淚零數里草堂頻舉步三門

元宮補鑄銘忘機相伴有巢鳥

樓居羣鶴來栖故及之

隨意成吟點落

螢學之右偏渠水流灌泮池地積濕流螢無數

今日歸來還悵望故人爲數幾晨

星

與君阻澗唯終日

余二月十二歸自長沙方山過便師僅一日耳

交臂失之我亦慚

苦憶憑誰傳渭北勞生又自滯周南

送舍弟赴歲試寓洛陽者又八日

飄蕭

不道逢緣拙壙垠何知與世堪愁絕徂春逢歲惡此懷兀兀

夢朝酣

### 讀李書源貞石歌戲書其後

吾讀貞石詞吁哉難與廢磊砢蘊所奇怪偉吐岬嶮用以誅  
姦諛不獨振瞶盲一讀爲再嘆剝然耳已驚猶思與之角無  
如敵者勅旣乃出變調殆亦寫不平閱昔魏闕徒尸祝祠其

生嚴潔肅將事架室高飛藁動輒伐山石支礎構兩楹千槌  
與萬指崖壑殷雷轟叱石日轉轂隱隱響駢軒況于密小邑  
吏者敢爲撓牽挽靡衆夫虐使肩背頰而獨傳此石屹立自  
孤撐傲兀不可干力與守厥經萬牛爭呀喘折軸堆縱橫竟  
莫能致之類焉卧墟阮嘗聞北山愚尚可感山靈豈其聚衆  
力不能輦以行君疑憑有物斯疑未得情當時迫斯役特以  
勢軋傾或有俠者流知勢未可爭呼邪虛應摹掉臂視若瞠  
舉之寔不力抗之莫敢鳴故欲聳其事陰將奪逆萌使知一  
物耳不爲暴力倖矧其滔天惡能欺蚩蚩氓新莽肆凶焰厥  
子懷怵怵假之鬼神告血塗門與閭此意得毋然願君細與  
評胡獨咏斯石先被以佳名吾欲補故牒大書彰彪駟標例

傳役夫勿俾埋其貞惜吾詞幻詭嘲詆世多輕用思附子篇  
濫廁二美并

猶思一聯健句

蒨頤

寄張雨村

張子寒吟聳詩肩詩成動有懷余篇嗟世我造不我與君獨  
愛之屢周旋如棄膾炙嗜羊棗世味焉以投腥羶去歲晤君  
成舊識文酒歡聚荒流連榻來又應州牧試因循不日陪往  
還手出一編賦日華瑩晶晃射驚而眩阨窮甘罹俗眼白歸  
卧小室聊窮年吾走四方半天下所識信子才且賢穰穰鈴  
肆矜富有網羅細碎中填然自捫良不虛此腹斯世早有邊  
孝先篇章爛漫既如此命舛莫救屯如遭朝夕鹽齏勤一飽

力行孝友篤所天汨沒閭閻名不耀迫之屢空豈非慙薦士  
古不繫職司于今此道無由專况我賤不能自致敢又汲汲  
于其間臨風三嘆斫地起發聲淚哽爲君咽近我得士有二  
李晚歲覓伴歸林泉一語提唱未增重謗者投隙胥眈眈攜  
摭文字成小矢無異利肉求瘡癩君與二子喜游衍兩窮相  
值共聯翩又尋老狂追所歡視世不以爭啾喧安用載酒來  
探元逕將相依瀆東川誓與吾子其終焉

起結極佳

藕頤

道旁兒

道旁有棄兒聲嘶啼無號連蟻皮一束齧律骨爲高尚能勤  
反側莫救腹內朽我朝過觀之惻惻怒焉切歸舍椎敲案哀

鳴起蕭騷天行屈惡歲何地安所逃惟賴敦薄俗分惠遠秋  
毫汝秀名劇邑地惟宛洛交田者連阡陌其氣舊習豪聯翩  
事遊冶羣呼逐其曹日食惟市脯傾橐厥家庖富兒據金窟  
不時濟老饕胡獨遺孺幼坐忍哺李膺我用力告汝使以動  
目蒿薄少致粥糜碎細遺糝膠且用活斯須再拜祝黔敖

懲晝睡

至人與天遊以神爲之主萬物飽熙熙吹息鼓靈府若如掩  
卷卧啗焉同一晷殘夢未破卯餘睡更交午呵欠終兀搖其  
氣先已腐時豈長我與而獨甘莽鹵

玉以瑕棄積金以頑留礪良質雖好在亦宜策其猛吾衰迫  
物役無由就閒屏擾擾隨旋蟻躍躍紛跳鼯投隙雖有窺何

與坐諸井書此聊自勗發曠回深省

天倪傷六鑿昏眊乃有此尸居憑曲肱假息卧隱几身化老  
眠蠶聲厯交曉豕斯豈有所遊妄希南郭子人生須臾間要  
以賢乎已不見晉祖生中夜着鞭起

授堂詩鈔卷之八

偃師武億虛谷著

孫秉恭校字

五月三日書源既別乃書所感寄之

乙巳四月首清夏書源過余至自襄急出一編其奇之撫節  
三嘆慨以慷謂言舊識二李名所業於古窺藩墻豈期今乃  
浩富有快予先睹罄其藏惟昔文詞並世出必有兩雄力相  
當自君沉沒於此藝誰與偶者高頡頏天使二子繼焉起幽  
谷響答鳴雷碩信知神秀有所鍾產此奇怪偉非常大則鳴  
鳳將唳鶴次亦流徵引清商偶置小試甘局促精氣睽賜投  
夜光宜乎睚眦駭衆目羣然肆口紛跳踉指瑕刈璞索癡痕  
捫燭叩盤標曠盲雜以惡詆騰厥議箕奮其舌簸且揚不解

此曹真婉變千古一律祖臧倉使如斯文小有疵韓子不廢  
苟與揚况爾挾勢相媚嫵依倚姻婭橫短長汝飽虎腹身餘  
幾猶爲先導隨羣俚我聞此語感君意豈以過激迫中腸聞  
者掩耳多疾走君獨勃起聲嗶嗶昌言不計受世嚇發揮公  
器何焯煌使之推轂天下士歟見貢公喜王陽予初北上京  
華道檢身於此失周防豪氣恣睢率語言世網屢搜觸且僵  
邇來摧抑知幾何得君奮呼助予狂蚍蜉有撼螳有怒乃欲  
因是巧中傷對此搯腕聊一鳴雙眵淚決盈盈睚萬事覆手  
幻雲雨斯須眯目成糝康世訾亦已隘而妨尤於吾輩輕陸  
梁詬厲所寄百憂嘗我其憊矣君方剛君又何爲徒皇皇彼  
何人斯未渠央

感事寄郭方山

方山初識我驚歲亦已換聚如風旋蓬別如冰搏霰茲事亦  
偶然每懷聲必咽乖違何由逢一來適吾願憶昨良宴會佳  
客集梁汴晴絮飛拂流澌逐漫漫當此春風閒坐逢老內  
翰指麾開四座相偕覓歡讌羅列窮芳鮮雜沓盛飮饌角爾  
獻竹萌金苞粲橘瓣卽席之所陳固頗費營辦是時諸耆俊  
忘分脫拘賤及乎雄詞發亦各呈爾撰張子學魯鄒實惟邗  
士彥屢勉効吏用抱牘守欵案感時誦遂初林泉早規伴錢  
俟憔悴人凍吟聳餘戰要以窮而工哀怨鳴騷亂初欲闕未  
宣徐乃纍如貫伯陽獨蘊藉秋水澄無瀾豈知蓄所有望洋  
極溟瀚而君當數豪脫如穎立見縱橫應其求博通網昔竄

搜古及僻碎微言動徵獻使人神驚怖不數河與漢更惟程  
老髯欸酌意彌戀間以語諧妙如睹東方幻盛集不可再迅  
忽喟永嘆自髯過陝郊厥疾亦已瞑詩老半客死遂乃嬰大  
患魂兮莫與招忍淚空爲唁憫君歸自北囊羞亦無羨衆鷄  
方待哺蓐炊迫日肝人生遽如許隱憂劇百箭而我益蹇拙  
比君更遭媢適歸日僵卧稍稍披詰傳自矜偶漁獵時復計  
補綻生來聞所未連也喜其間迫欲叩之君去取別真贗胡  
獨君南行時遊汝陽惡懷驚且惋古有好事徒千里逐中散  
時不往從之于責焉可違少而喜新知衰則感舊館况予餘  
勞生塵鞅更羈絆屬君發古誼策猛起吾懦因之寫吾懷感  
念重爲繼詞煩不知殺毋亦資嘲訕嗟哉生有涯相島各

飯

聞西霞先生出宰遂平感賦

回首青雲成往事，縛身黃綬宜固窮。  
春陵隨處呼漫叟，滌上于今掖醉翁。  
禾黍秋深雲際野，隴陂行隔雨垂芄。  
閒吟舊製玉堂句，潤色荒城語化工。

其二

與山濯水遶吳房，天假先生吏隱鄉。  
舊事閑談驚野母，俗禁拍手出谿羊。  
當年異跡傳千載，今日閒曹滯一方。  
簿領侵尋須撥棄，好將豈弟老行藏。

其三

我慕凌雲曾作賦，誰憐垂翼只投閒。  
歐梅知舉文不變，己亥秋

上惠文體庸濫十月覆考試官西霞先生  
始自湘西入試明年分校禮闈最稱得士  
皓首爲期輕世好青衫可脫祝公還湖山料得平分取他日  
追隨向碧灣

輓賀君常

憶昨南遊過魯陽破帷冷壁識君常厄行在已逢今歲死未  
首邱滯異鄉風及薄夫知隕涕經傳弟子舊成行此間無處  
堪客榻好伴四阴地下狂

題張會亭松下課子圖

一卷課兒聞洛誦千髯拂浪送龍吟人間不少傳家事惟有  
歲寒此日心

嘗嘆失學從兒懶自覺飢驅似杜翁幾日歸來尋舊業

月下嘯疎桐

苦雨

積日苦陰雨所苦連比屋京師盛豪遊飛走動轉轂豈意困

泥潦輾下鞭局促舊傳明查樓

庚子五月癸子火今不復存

廣和傍遺躡

連蕞起十仞架閣高蠱蠹厥中譜新聲妙麗非一族其餘歌

舞地窮窳繚而曲墮填日閱閱隊趨爭雁鴛胡令礙衢遠斯

地盡幽獨遂致半遊民枵然負其腹燕市豪俠宿歡晏馳與

逐有樓號金陵義肴過鼎餽每食一下箸爲費錢數斛餘潤建

罽胃自喜囊不縮如使長積漚羣將失業哭祝諸微生計焉

得不同束哀哀衆餓夫躰身濕般舫行乞屢朝昏病呻亦何

酷闖闖蹲窮簷溜濺肩翻瀑誰與敢重閤哺以殘糜粥皆云

臧朝爨然薪轟爆竹斯須雲頽山瀾望漫原陸漠漲迫庭除  
盆湧溢街瀆擾擾絕塵軌閤若九門肅惟時下土岷共吾泥  
淖辱吾詩更吞咽長歌不能續

漢匾壺

漢器近代不間出長怪溷鬱埋塵窩此壺此製形模古喜爲  
予有重摩抄嘗按禮圖訪遺則壺尊所貴明非詭惟祀與饗  
兩設此重之不啻尊有犧用斲眉壽寶萬年渥衍滂沛受福  
那其製以圓或以方置諸几右皆無頗後者時出幻新意惟  
是扁腹如鼓鼉腹以純素抱太璞兩環貫耳聲敲珂胡獨細  
絞相糾結用修邊幅飾么麼壺周邊隱起花紋今尚不可辨乃知良匠有深  
意文質中之變曰科博古圖載漢製扁壺有文者二純素者一土蝕漏滲健歲月

鬼靈所守常禁呵有時地復出其寶鬱然佳氣浮旋螺屢蠶  
紺碧遶痕蘇蚓盤蟲結絲垂縞舞陽張子偏好奇百計搆獲  
驚且叱傳觀不忍蘊箱篋手持遺子屬予歌予歌斫地褊袒  
起倒傾金罍喜顏酡安得繪手爲摹出重使此圖補宣和

題袁辛旦圖二親小像詩并序

陽湖袁氏有子曰亮采字辛旦少孤生三月而父歿  
京師旣歿守其母訓于今三十六年自痛生不見父  
問于母得彷彿于是覓工繪事者爲圖并附母姜孺  
人像于右

袁子奉所圖瞻慕永朝夕晬然二老容唱題傳藉藉予亦爲  
君咏痛君撫心擬請從尊公紀三嘆彌嘆嗒少也走京師連

蹇動經阮有才獨軒奇萬夫望辟易文定舊識之

故大學士武進劉公

也比于輩有翟豈意命途舛竟折垂雲翮身既不偶時飢走

胡云索嗟吾親老矣盛顏不容借飛光速跳丸浮生逐過客

以斯激內熱紆悶衷賜迫偃病呼飲衾彌留起易簣賴此兩

死友

張龍占吳宜燮

扶持歸其魄慘慘及故里鄉人皆哽噎倚閭雙

白髮老淚痕成液惟時痛厥如呼天聲日厄涕灑江水溢血

感楓林赤誓欲捐以身相與其窶窶旣而念藐孤所關袁氏

祈吾豈諒溝瀆不一長顧惜乃用茹其苦操作凍皴瘠或身

漂絜絮或手爲絺綌上以供魚菽下以備乾腊重親爲致歡

于焉藉扶掖婉婉小弱子教督臥不席出父所遺書說口親

無教之死媿其姜勤生母文伯持此報逝者逝者安其

齊餓稱賢嬰杵死孰易斯惟立孤耳蓋不負巾幗吾今爲此  
詞傳十及千百流於後世者或用書竹帛婦節有苦貞天壤  
垂赫奕士如貳其行行當踧躅再拜瞻斯圖我懷安可搯

都下盛傳海棠圖詩者亦漫爲一絕句

輕陰薄霧雨零絲纖影工顰小睡宜費盡人間唐突句何如  
杜老補題詩

送人歸蜀

幻盡竿頭幻也非逢場啼笑總堪悲錦城花發應相待好趁  
春風聽子規

再題海棠圖句應友人之屬

往歷川中憤識顏碧雞坊下領仙班於今腸斷無消息畫手  
重爲寫淚殷

曾憐濃蕊紫拳絲爛盡春芳又一時拚我  
下土他生  
暈上淡胭脂

笑閱桃春與李春阿誰金屋貯斯人看來只此幽籬下也筭  
相逢得季倫

昌州好事頻開宴徐老多傳舊有巢管領春風屬我輩憑邀  
蜀客伴衡茅

題少華山雜齣四摺亦用海棠屬興戲東朱少白牛次  
原

嬌盡春眠剩此身薄羅翠幄步香茵無端花信風偏惡奪得

幽紅自在春

淺黛鎖啼眉有壓媽紅暈笑頰生窩含啼宜笑誰消得奈此  
斷腸無語何

苦怨王孫歸未歸春窺小閣暗香霏夜深不敢依花睡惆悵

下山郎應違

溫飛卿題磁嶺海棠花詩  
王孫又誰恨惆悵下山遲

淚深紅袖曉妝淡濕遍青衫別意濃待約花期歸緩緩更牽  
離緒恨重重

寄朱少白二首

慘慘一朝別兀兀十里睡念君意綢繆永思彌感喟憶出城

西門有友從連戀

牛次原

薄暮投荒村數子共憔悴

是日史蒼言畢恬蹊

相送宿  
呂村

謂言步崇岡一睇月娟娟莽蒼夜氣沉撫景只堪慙

出舍復入舍嗒焉愁如醉閱世已強半胡獨爲情累

脫略看時輩率然亦已久不謂守君約束縛老吏手狂藥未  
敢嘗三旬斷入口因之說消灰形搏土偶塞責以區區十  
蓋得八九顧我防橫潰壅土成培塿恐終決一朝隱憂遺吾  
友

哭李異凡七兄

太息斯人長契濶高情感我淚盈班與君昆季畫心諾頻歲  
往來成古歡逝者如斯嘆去水亡之命矣號空山元堂片石  
勒銘處不以愧詞愧我顏

數日遊月山九峯兩寺並見西霞先生題壁因感賦作

四小詩

歲歲春風遍桃李人人引領屬歐梅一從謫落仙班後任意  
尋僧稱意回

今朝監郡真無事不道傍人更見猜檢點吟情題好句寺僧  
解着護浮埃

嘆息鄂公歸寂寞

二寺並有剛烈公題句

新詩今日爲誰裁剩餘懷抱

空多淚留鎮山門取次開

題桂未谷小照

我來從歷下首謁老經師正宇光如炬簪書鬢已絲摹追秦  
迄漢伯仲邈與斯

翛然一風姿

題朱肖野家藏憶園禊飲圖

都城盛遊覽冉冉就頽謝頗傳鶴亭翁雅會醉晨夜王氏舊

憶聞零落餘臺榭翁嘗謁選初館甥于焉舍清姿標玉稜逸  
與凌雲化手具召諸老勝日集休假三月春序暮清和漸逼  
夏修禊循故事彷彿洛與灞藉草綠流茵撫石潤生鱗墻外  
兩海棠暈紅紛擺亞影月淡微明神人來姑射酌酒與之歡  
彼姝美無價何爲避絕豔不一酣其下及乎行作吏塵鞅煩  
夙駕日判銜尾牘晷刻不容借却憶良宴會安得趁春社投  
身賦歸來一官倏云罷強項雖失候折腰猶幸赦可惜空囊  
橐無計求田舍傳家賴此圖遺子書挿架我今後斯翁技圖  
過淡蔗尙當想其人高風足陵跨况獲交令于把袂屢慰藉  
掩卷付襲藏喟然爲三咤

寓舍舊爲鄉人侯君故居也

嘆息侯生老滯留倍我多  
陋居宜小隱  
羈地礙狂歌  
去徑纔隨  
盤桓跡不磨  
他年尋勝事  
老子此婆娑

阜蓋朱幡去不回  
新亭面面爲誰開  
滄浪若比桃花觀  
只有劉郎此度來

題訪碑圖

一蹇困蹶躒一車轉  
輾轉誰與矜  
幽尋踏此春山綠  
咄哉青子肩任搜遺錄  
携工兩三人  
響揚傳穹谷  
四山寂歷深  
琤然韻啄木  
風雨溜積痕  
文問蘚蝕禿  
披剔抉其真  
翠拙成束歸來  
或見遺致我  
勞畫腹  
韓子之陳倉  
零淚盈一掬  
不聞手爲摩  
好古未爲獨  
再拜君所獲  
鄙人終碌碌

題劉髯楫亭小照

梧陰竹影結幽栖  
欲解秋思喚小奚  
翻椀乳花輕綠漾  
箇中自在可分攜

我爲傲吏幻成蝶  
君作散人冷似鷗

時謝堂  
邑幕

領畧秋容隨意

此生何處是沉浮

彈指一甌浮碧圓  
劉郎前度已年年  
飄蕭絲髮蒼如許  
誰憶圖中老謫仙

題季廉夫拈花鍾馗

劈盡羣魔怒斫雷  
從誰解笑笑拂衣  
回飯甘鬼趣真同蠟  
不若拈花獨嗅來

和阮詹事滄浪亭集飲圖

著意秋容罨翠開  
隔句詩債又相催  
此間容我留三月  
日日

滄浪亭上來

何夢華滌碑圖

淨拭  
細啄苔古人生面一時開誰傾好古滂沱淚酒向  
西陵片石來

趙和鳴家藏八駿圖

駿骨塵埋易水臺人問何自八龍來圖成粉墨今簫瑟誰感  
王孫拂拭開

書李居來壁二首

謾謾龍吟階下生老蒼鼓鬣變濤聲寒來歲歲長如許誰向  
此君理舊盟

又到君家派作東自嘆何事太怱怱他年此壁留題在真是

雪天印爪鴻

題吳念湖畫竹

玉立亭亭森數竿此君多被野風殘  
有時拂拭開生面老節培成耐歲寒